



UNIVERSITÄTS-
BIBLIOTHEK
PADERBORN

Universitätsbibliothek Paderborn

Agenda Dioecesis Paderbornensis Rituali Romano accommodata

Hermann Werner <Paderborn, Bischof>

Paderbornæ, 1753

De iis quæ in Sacramentorum administratione generaliter observanda
sunt.

urn:nbn:de:hbz:466:1-36023



DE IIS
 QUÆ IN SACRAMENTORVM
 ADMINISTRATIONE
 GENERALITER SERVANDA SVNT.



Tea, quæ ex antiquis Catholicæ Ecclesiæ institutis, & sacrorum Canonum, summorumq; Pontificum decretis de Sacramentorum ritibus ac cæremoniis hoc loco præscribuntur, qua par est, diligentia ac religione custodiantur, & ubiq; fideliter serventur; illud ante omnia scire & observare convenit, quod Sacrosancta Tridentina Synodus de iis ritibus *sess. 7. Can. 13.* decrevit in hæc verba:

Si quis dixerit, receptos & approbatos Ecclesiæ Catholicæ ritus in solemnibus Sacramentorum administratione adhiberi consuetos, aut contemni, aut sine peccato à ministris pro libito omitti, aut in novos alios per quemcumque Ecclesiarum Pastorem mutari posse, anathema sit.

Cùm igitur in Ecclesia Dei nihil sanctius, aut utilius, nihilq; excellentius, aut magis divinum habeatur, quàm Sacramenta ad humani generis salutem à Christo Domino instituta; Parochus, vel quivis alius Sacerdos, ad quem eorum administratio pertinet, meminisse debet imprimis, se sancta tractare; atq; omni ferè temporis momento ad tam sanctæ administrationis officium paratum esse oportere,

Quamobrem illud perpetuò curabit, ut integrè, castè, pieq; vitam agat: nam, etsi Sacramenta ab impuris coinquinari non possint, neq; à pravis ministris eorum effectus impediari; impurè tamen & indignè ea administrantes, in æternæ damnationis reatum incidunt. Sacerdos igitur, si fuerit peccati mortalis sibi conscius (quod absit) ad Sacramentorum administrationem non audeat accedere: nisi priùs corde pœniteat; sed si habeat copiam Confessarii, & temporis locique ratio ferat, confiteri debet.

Quacùnque diei ac noctis horâ ad Sacramenta ministranda vocabitur, nullam officio suo præstando (præsertim si necessitas urgeat) moram interponat. Ac propterea populum sæpè, prout sese offeret occasio præmonebit, ut cùm sacro ministerio opus fuerit, se quamprimùm advocet, nulla temporis aut cujuscunque incommodi habita ratione.

Ipse verò antequam ad hujusmodi administrationem accedat, paululum, si opportunitas dabitur orationi, & sacræ rei, quam acturus est, meditationi vacabit, atque ordinem ministrandi & cæremonias pro temporis spatio prævidebit & perleger.

In omni Sacramentorum administratione superpelliceo sit indutus, & desuper stolâ ejus coloris, quem Sacramenti ritus exposcit, nisi in Sacramento pœnitentiæ ministrando occasio, vel consuetudo, vel locus interdum aliter suadeat,

Curabit etiam, ut sacra supellex, vestes, ornamenta, linteamina, & vasa ministerii, integra, nitidâque sint & munda,

In Sacramentorum administratione eorum virtutem, usum, ac utilitatem, & cæremoniarum significationes, ut Concilium Tridentinum præcipit, ex sanctorum Patrum, & Catechismi Romani doctrinâ, ubi commodè fieri poterit, diligenter explicabit.

Instruções Generales.

Dum Sacramentum aliquod ministrat, singula verba, quæ ad illius formam & ministerium pertinent, attentè, distinctè, & piè claraq; voce pronuntiabit. Similiter & alias orationes & preces devotè & religiosè dicet; nec memoriæ, quæ labilis, confidet; sed omnia recitabit ex libro. Reliquas præterea cæremonias ac ritus ita decenter, graviq; actione peraget, ut astantes ad cælestium rerum cogitationem erigat, & attentos reddat.

Adminiſtrandum procedens, rei, quam tractaturus est, intentus sit: nec de iis, quæ ad ipsum non pertinent, quidquam cum aliquo loquatur, in ipsaq; administratione actualem attentionem & intentionem habere studeat, vel saltem virtuales faciendi, quod in eo facit Ecclesia.

Illud porro diligenter caveat, ne in Sacramentorum administratione aliquid, quavis de causâ, directè vel indirectè exigat, aut petat; sed ea gratis ministret, & ut omni Simonix vel avaritix suspicione, nedum crimine, longissimè absit. Si quid vero nomine eleemosynæ, aut devotionis studio, peracto jam Sacramento, spontè à fidelibus offeratur, id licitè pro consuetudine locorum accipere poterit, nisi aliter Episcopo videatur.

Fidelibus alienæ parochiæ Sacramenta non ministrabit, nisi necessitatis causâ, vel de licentiâ Parochi, vel Ordinarii.

Omnes autem, qui Sacramenta suscipiunt, loco, & tempore opportuno monebit, ut remoto inani colloquio, habitu, actuq; indecenti, piè ac devotè Sacramentis intersint, & ea, qua par est, reverentiâ suscipiant.

Librum hunc Rituales (ubi opus fuerit) semper, cum ministrabit, secum habebit, ritusq; ac cæremonias in eo præscriptas diligentè observabit.

Cæterum, illorum tantum Sacramentorum, quorum administratio ad Parochos pertinet, ritus hoc opere præscribuntur: cujusmodi sunt, Baptismus, Pœnitentia, Eucharistia, Extrema unctio, & Matrimonium. Reliqua verò duo Sacramenta Confirmationis, & Ordinis, cum Episcoporum sint, ritus suos habent in Pontificali præscriptos. Et ea quæ de iis, aliisq; Sacramentis, scire, servare, & docere Parochi debent, ex Catechismo Romano, Nucleo Catechetico, aliisq; libris desumi possunt. Siquidem hic de iis ferè tantum agere, instituti operis ratio postulat, quæ ad ipsorum quinque Sacramentorum ritus pertinent,

